

本草崇原集說

陳豪署

仲昂庭先生著

本草崇原集說

八十二更盛慶蕃署

宣統二年庚戌
春日開雕

仲氏藏板

本草崇原集說序

本草崇原一書。康熙時錢唐張
隱菴先生刪定神農本經。探五
運六氣之原。陰陽消長之理。就
原文逐加註釋。乾隆時閩陳氏
修園著本草經讀。半師其說。同

時葉氏天士著本草經解徐氏
靈胎著本草百種錄雖見知見
仁各有心得而皆以本經為綱
誠以藥各有性性者稟於陰陽
運氣惟上古聖人觀天察地能
明其性故言本草必宗本經近

百年来醫學失傳。務博者輒讀
李時珍綱目等書。而淺陋之輩。

則取本草備要。本草從新。藥性
賦諸篇。但知某藥治某病。某病
須某方。不探五運六氣之原。不
明陰陽消長之理。徒襲其用。未

究其性自欺欺人良可哂已錢
唐仲昂庭先生余中表伯升行
也邃於理學講醫一宗本經長
沙及張氏高氏書疏方用藥神
妙變化曾徵辟入都供奉

慈聖歸

主杭垣醫局二十餘年慮近時

本草無善本也。爰取崇原為綱。
附載經讀經解百種錄。并張氏
侶山堂類辨。高氏醫學真傳諸
說。參酌己意。纂集成編。名曰本
草崇原集說。屬草甫定。先生遽
歸道山。殘編零落。塗乙漫漶。余

與王君羹梅夙聆先生緒論不
揣固陋彙集各書搜輯參校凡
先生遺墨咸錄載之不敢增損
間有眉批列於經讀經解諸本
而原文已經先生刪去者則并
眉批亦節之書成付梓以竟先

生之志。後之覽者。因是編而上
探五運六氣之原。陰陽消長之
理。醫學日明。羣生暢遂。庶不負
先生纂集之苦心乎。

宣統元年己酉六月章炳森序



本草崇原原序

神農本草謂之本經計三百六十五種以應周天之數。上品一百二十五種爲君。無毒。主久服養命延年。益氣輕身。神仙不老。中品一百二十種爲臣。或有毒。或無毒。主通調血氣。卻邪治病。下品一百二十種爲佐使。或有毒。或無毒。或大毒。主除寒熱邪氣。破積聚癥瘕。中病卽止。夫天地開闢。草木始生。農皇仰觀天之六氣。俯察地之五行。六氣者。厥陰少陰太陰少陽陽明太陽三陰三陽是也。五行者。甲己運土。乙庚運金。丙辛運水。丁壬運木。戊癸運火。五運五行是也。本

五運六氣之理。辯草木金石蟲魚禽獸之性。而合人之五藏六府十二經脉。有寒熱升降補瀉之治。天地萬物不外五行。其初產也。有東南西北中之五方。其生育也。有春夏秋冬長夏之五時。其形有青黃赤白黑之五色。其氣有臊焦香腥腐之五臭。其質有酸苦甘辛鹹之五味。著爲藥性。開物成務。傳於後世。詞古義深。難於窺測。後人纂集藥性。不明本經。但言某藥治某病。某病須某藥。不探其原。祇言其治。是藥用也。非藥性也。知其性而用之。則用之有本。神變無方。襲其用而用之。則用之無本。窒礙難通。余故詮釋本經。

闡明藥性。端本五運六氣之理。解釋詳備。俾上古之言。瞭如指掌。運氣之理。炳如日星。爲格物致知三才合一之道。其後人之不經臆說。逐末忘本者。槩置勿錄。學者能於此會悟之。則神農觀天察地。窮理盡性之學。庶幾近之。後世之書有涉譌謬者。屏棄勿道可也。

凡例

一神農本經三百六十五種。應周天之數。崇原上品一百二十五種。數與本經合。內有附載三十二種。皆本經所無。則已刪本經三十二種矣。中品一百三種。內附載十五種。亦刪本經三十二種。下品六十一種。內附載四種。刪本經六十三種。不知張氏當時刪節何意。今編次品數。悉仍張氏之舊。不補本經。以此書名崇原集說。非本經集說也。惟鹿茸一味。本經列中品。崇原列上品。仲氏改從本經。仍列中品。又生薑。崇原附乾薑條內。今依經讀。提出另列。

一崇原闡發藥性。皆從運氣著筆。爲諸家之冠。惟字句間有煩冗處。仲氏畧加刪改。今崇原下有與張氏原本不同者。皆仲氏所改也。閱者如欲尋張氏原文。自有本草崇原在。

一經讀經解百種錄所收藥品。有爲崇原所不載者。不錄。說不同而無精義者。亦不錄。刪節筆削。悉具苦心。故每味下有採諸說有不採諸說者。大約採經讀者最多。經解百種錄則間及之。并摘錄類辯真傳數則。總以崇原爲主。諸說爲輔。一凡崇原經讀經解百種錄諸說。皆逐一標明。崇

原原本本中間有愚按及某某曰等列之圈外者
仍照舊式若仲氏說則列於後更作圈以別之
仿四書集註圈外註例也亦有仲氏評論諸家
者列爲眉批若爲諸家之言必標明其人以期
醒目惟本經原文必高一格所以示尊經而正
綱目體例之失

一仲氏著此書屬草甫定未及繕本而卒其說散
見於本草崇原本草三家合註本草經讀醫學
眞傳侶山堂類辯諸書東鱗西爪彙集頗難且
又塗乙漫漶今就可辨者錄之不敢增損其筆

誤及重複脫落處補正之。崇原本文有誤字校正之。或經讀本著批。而三家本已刪原文。三家本著批。而經讀本已刪原文者。皆節去之。管窺蠡測。疏漏不免。海內名家。糾正爲幸。一經讀一書。仲氏亦有批註。其藥品非本經所有。而經讀列入附錄者。仲氏亦多加墨。間有引類辨真傳之語。以明其性者。今不忍割愛。特附於後。以存仲氏之說。閱者勿謂其羈雜也。

章炳森識